

La'o Hamutuk

Instituto Timor-Leste ba Monitor no Analiza Dezenvolvimentu
Rua Felicidade, Gricenfor, Bairro Central, Dili, Timor-Leste
Tel: +670-3321040 ka +670-77234330 (mobile) email: laohamutuk@gmail.com
Website: www.laohamutuk.org



KOMUNIKADU IMPRENSA

La'o Hamutuk Husu Parlamentu Nasionál atu Hasai Kriminalizasaun ba Defamasaun husi Kódigu Penal Timor-Leste

Iha dia 3 Juñu La'o Hamutuk hato'o submisaun ba Komisaun A Parlamentu Nasionál kona-ba Projetu Lei Alterasaun ba Kódigu Penál, no husu Parlamentu atu separa ho klaridade matéria rua ne'ebé iha natureza diferente: protesauun ba vítima violénsia seksuál no kriminalizasaun defamasaun.

La'o Hamutuk apoiu medida sira atu kriminaliza asédiu seksuál, komportamentu seksuál la ho konsentimentu no inestu. Vítima violénsia seksuál prezisa protesauun forte, asesu ba justisa, dignidade no sistema justisa ne'ebé seguru, sensível no konfidentiál.

Maibé, La'o Hamutuk rejeita proposta atu kriminaliza defamasaun iha Kódigu Penál. La'o Hamutuk la defende falsidade, ofensa ka imputasaun falsu. Defamasaun bele hamosu prejuizu real ba indivíduo, família no comunidade. Maibé resposta ne'ebé justu, efetivu no proporsional la'ós prizaun. Mekanizmu apropriadu sira mak direitu resposta, retifikasaun, mediasaun, reparasaun sivil, uza mekanizmu iha Konsellu Imprensa, étika komunikasaun sosiál, literasia dijital no verifikasaun faktu independente.

La'o Hamutuk rekoñese katak liberdade espresaun la'ós direitu absolutu, no katak Estadu iha devér atu proteje onra, naran di'ak no reputasaun. Maibé, iha Estadu demokrátiku, kualkér restrisaun ba liberdade espresaun tenke sai nesesária, proporsional no medida menus restritiva. Bainhira iha ona direitu resposta, retifikasaun, mediasaun, reparasaun sivil no mekanizmu Konsellu Imprensa, pena prizaun ba defamasaun sai resposta ne'ebé todan liu no risku liu.

Kriminalizasaun defamasaun ho pena prizaun bele hamosu ambiente ta'uk, auto-sensura- evita ko'alia kona-ba asuntu sensível no intimidasaun. Jornalista sira bele sente presauun iha investigasaun kona-ba asuntu públiku. Denunsiantes sira bele ta'uk atu ko'alia. Akadémiku, ativista, vítima no sidadaun sira bele evita atu hato'o sira nian hanoin. Komunitade afetada bele sente intimidasaun bainhira hato'o preokupasaun kona-ba korrupsaun, abuzu poder, kontratu públiku, rekursu naturál, mina no gás, mineiru, ambiente, infraestrutura, bee, eletrisidade, saúde no edukasaun.

Maski Projetu Lei bele prevee salvaguarda ba lia-loos, boa-fé ka interese públiku, salvaguarda sira ne'e normálmente la'o depois prosesu kriminál hahú. Efeito intimidatóriu

mosu kedas bainhira jornalista, denunsianta ka sidadaun hetan keixa, investigasaun, kustu advogadu, stigma sosiál no ameasa prizaun. Tanba ne'e, problema prinsipál la'ós de'it sentensa final, maibe natureza kriminalál husi prosesu rasik.

Iha setór ne'ebé envolve rekursu públiku, kontratu boot, ambiente no impaktu ba comunidade, liberdade atu husu pergunta no publika análize independente mak parte esensial husi governasaun di'ak. Ida ne'e la'ós atu impede desenvolvimentu, maibe atu garante transparénsia, responsabilidade no konfiansa públika. Lei penál labele sai instrumentu atu limita povu afetadu sira nian lian ka hamenus kontrolu demokrátiku ba desizaun sira ne'ebé envolve interesse públiku.

Memória istória Timor-Leste hanorin ita atu kuidadu ho kualkér lei ne'ebé bele limita liberdade espresaun no debate públiku. Demokrasia ne'ebé forte prezisa imprensa independente, denunsianta ne'ebé protejidu, no sidadaun sira ne'ebé livre atu hato'o preokupasaun la ho intimidasaun.

Iha tinan 2020, proposta hanesan kona-ba kriminalizasaun defamasaun husi Ministériu Justisa hetan rezisténsia boot husi públiku, sociedade sivil, jornalista no defensor direitos humanos. Iha tempu ne'ebá, La'ó Hamutuk hato'o submisaun no karta aberta ba autoridade relevante sira atu rejeita proposta refere. Governu suspende prosesu ne'e iha Agostu 2020, maibe proposta la kansela permanente.

Agora, Parlamentu Nasionál konsidera fila fali proposta kriminalizasaun defamasaun iha 2026, La'ó Hamutuk husu Komisaun A no Parlamentu Nasionál atu aprende husi prosesu pasadu. Parlamentu tenke garante konsultasaun públika nasional ne'ebé substantiva, inkluziva no transparente antes votasaun final.

La'ó Hamutuk respeita Parlamentu Nasionál nian kompeténsia konstitusionál atu halo lei. Husi ne'ebá, rekomendasaun sira ne'e hato'o hanesan kontribuisaun sociedade sivil atu ajuda prosesu lejizlativa sai transparente, inkluzivu, proporsional no kompatibel ho direitos humanos liu.

La'ó Hamutuk husu Komisaun A no Parlamentu Nasionál atu:

Primeiru, hasai artigu 187.º-A to'ó 187.º-H husi Projetu Lei Alterasaun ba Kódigu Penál, liuliu dispozisaun sira ne'ebé kriminaliza defamasaun, injuria, ofensa ba memória matebian - ofensa ba dignidade no naran-di'ak ema ne'ebé mate ona no ofensa ba entidade kolektiva.

Segundu, kontinua diskute no aprova medida sira ne'ebé atu hametin protesasaun ba vítima violénsia seksuál, inklui asédu seksuál, importunasaun seksuál, komportamentu seksuál la ho konsentimentu no inestu.

Terseiru, realiza konsultasaun públika nasional iha Dili no munisípiu sira, ho dokumentu jurídiku iha Tetun ne'ebé klaru no asesivel, no envolve jornalista, Konsellu Imprensa, organizasaun fetu no labarik, juventude, ema ho defisiénsia, PDHJ, Ministériu Públiku, PNTL, Defensória Públika, Igreja, autoridade lokal, akadémiku, sobrevivente violénsia seksuál, comunidade rural no organizasaun sociedade sivil.

Kuartu, reforsa mekanizmu sivíl no institusionál atu proteje reputasaun, liu husi direitu resposta, retifikasaun, mediasaun, reparasaun sivíl, Konsellu Imprensa, étika komunikasaun sosiál, literasia dijital no verifikasaun faktu independente.

Kintu, fó prioridade ba aprovasaun lei protesaun denunsianta no fonte informasaun iha interese públiku, atu ema sira ne'ebé revela informasaun kona-ba korrupsaun, abuzu poder, violénsia ka risku ambientál la hetan intimidasaun ka retaliasaun.

La'ó Hamutuk reafirma katak protesaun ba reputasaun importante tebes, maibé, proposta atu kriminaliza defamasaun ho pena prizaun kontinua apresenta risku significativu ba liberdade espresaun. Pena prizaun bele uza hanesan instrumentu atu intimida jornalista, denunsianta no sidadaun sira ne'ebé halo kritika ne'ebé iha fundamentadu no iha interese públiku. Tanba ne'e, Parlamentu tenke separa matéria violénsia seksuál husi matéria defamasaun.

Pena prizaun la'ós resposta ne'ebé apropriadu. Lei penál labele uza hanesan instrumentu atu limita kritika lejítima, denunsia iha boa-fé, jornalismo independente, peskiza akadémika, partisipasaun públika ka lian comunidade afetada.

Proteje vítima. Proteje reputasaun. Maibé labele lori ema kritiku ba prizaun.

Kritika la'ós krime. Denunsia iha boa-fé la'ós krime. Partisipasaun públika la'ós krime.

Bele hetan La'ó Hamutuk nian submisaun iha aneksu no links;

<https://www.laohamutuk.org/Justice/defamation/2026/260603LHSubKodPenal.pdf>

Ekipa La'ó Hamutuk, 4 Juñu 2026



Marta da Silva



Celestino Gusmão



Charles Scheiner



Mariano Ferreira



Jonathan Gonsalves



Elia da Costa Araujo



Elivania Alves Correia